

ЎЗБЕКИСТОН РЕСПУБЛИКАСИ ПРЕЗИДЕНТИНИНГ
ҚАРОРИ**131 Деҳқон бозорлари ва савдо комплекслари фаолиятини ташкил қилишни янада такомиллаштириш чоратадбирлари тўғрисида**

Республика деҳқон (озик-овқат) бозорлари, ихтисослаштирилган ва буюм бозорлари (савдо комплекслари) фаолиятини бошқариш тизимини янада такомиллаштириш, улар томонидан кўрсатиладиган хизмат турлари ва ҳажмларини кенгайтириш, аҳолига хизмат кўрсатиш сифатини ошириш, бозорлар ва савдо комплексларида пул оқимлари тўлиқроқ ҳисобга олинишини таъминлаш, шунингдек, сифати паст, қалбаки ва контрабанда маҳсулотлари сотилишига йўл қўймаслик мақсадида:

1. Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари Ўзбекистон Республикаси Давлат солиқ қўмитаси, Молия вазирлиги, Монополиядан чиқариш ва рақобатни ривожлантириш давлат қўмитаси билан биргаликда:

бир ой муддатда деҳқон (озик-овқат) бозорлари, ихтисослаштирилган ва буюм бозорлари (савдо комплекслари) паспортларини тузишни ниҳоясига етказиб, ушбу паспортларга уларнинг ихтисослашуви ва иш тартиби, турғун савдо нуқталари ва савдо ўринлари миқдори ва жойлашуви, уларнинг худудида мавжуд бўлган инфраструктура объектлари ва кўрсатилаётган хизмат турлари тўғрисидаги маълумотларни албатта киритсинлар;

2010 йилнинг 1 июнига қадар 100 та ва ундан кўпроқ турғун савдо нуқталари ва савдо ўринлари мавжуд бўлган барча бозорлар, савдо комплекслари ва уларнинг филиалларида давлат солиқ хизмати органларининг ходимлари томонидан йиғимнинг тўлиқлигини ҳар куни текширган ҳолда фақат банк тизими орқали бир марталик йиғим ва ижара тўловлари ундирилишининг автоматлаштирилган тарзда ҳисобга олинишини мажбурий тартибда жорий қилсинлар;

2010 йилнинг 1 июнигача бўлган муддатда бозорлар худудида ва уларга туташ худудларда жойлашган барча автотранспорт воситаларини вақтинча сақлаш жойларининг белгиланган тартибда бозорлар ва савдо комплексларига топширилишини таъминласинлар, уларнинг назорат-касса машиналари ва тўлов терминаллари билан жиҳозланишини, шунингдек 300 та ва ундан кўпроқ турғун савдо нуқталари ва савдо ўринларига эга бўлган бозорлар ва савдо комплексларида машиналарнинг кириш ва чиқиш вақтини қайд этиб турадиган электрон ҳисоблагичлар мажбурий ўрнатилишини назарда тутсинлар;

2010 йилнинг 1 июлигача бўлган муддатда давлат ветеринария хизмати ва санитария-эпидемиология назорати органларини жалб этган ҳолда ҳар бир деҳқон (озик-овқат) бозорида бозорга олиб келинаётган озиқ-овқат маҳсулотлари сифатининг экспресс-анализ лабораторияларини ташкил қилиб,

тегишли сертификат берсинлар ва тегишли сертификатга эга бўлмаган маҳсулотларнинг сотилишини тақиқласинлар;

2011 йилнинг 1 январига қадар муддатда барча ихтисослаштирилган ва буюм бозорларини назорат-касса машиналари ва тўлов терминаллари билан жиҳозланган турғун савдо нуқталаридан иборат бўлган савдо комплекслари этиб қайта ташкил қилсинлар, истеъмолда бўлган мол-мулк савдоси бўйича бозорлар бундан мустасно.

2. Ўзбекистон Республикаси Президентининг 2009 йил 30 октябрдаги Р-3296-сон фармойишига мувофиқ тузилган ишчи комиссиясининг, Ўзбекистон Республикаси Давлат солиқ қўмитаси, Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликларининг 2010 йилнинг 1 июлига қадар 1-иловага мувофиқ рўйхат бўйича савдо комплекслари, деҳқон, ихтисослаштирилган ва буюм бозорларида аҳоли билан пул ҳисобкитобларини амалга оширувчи объектларни фискал хотирали назорат-касса машиналари билан мажбурий равишда қўшимча жиҳозлаш тўғрисидаги таклифи қабул қилинсин.

3. Шундай тартиб ўрнатилсинки, унга мувофиқ:

бозорлардаги савдо ўринлари жисмоний шахсларга фақат уларнинг якка тартибдаги тадбиркор сифатида рўйхатдан ўтгани тўғрисидаги гувоҳномаси мавжуд бўлган тақдирдагина берилади, ўзи етиштирган қишлоқ хўжалик маҳсулотларини, шунингдек истеъмолда бўлган товарларни сотиш ҳоллари бундан мустасно;

сотиб олинган товарлар ва хизматлар учун харидорларга бериладиган касса чекларида солиқ тўловчининг номи ва индивидуал рақами (ИНН), харид қилинган вақти ва санаси, товарнинг номи, унинг қиймати, касса аппарати-нинг рақами тўғрисидаги маълумотлар мавжуд бўлиши керак;

бозорларнинг ҳудудида ер участкалари ажратиб берилишига, шунингдек бозорга тегишли кўчмас мулк объектларини жисмоний ва юридик шахсларга мулк қилиб топширилишига йўл қўйилмайди.

4. Қорақалпоғистон Республикаси Вазирлар Кенгаши, вилоятлар ва Тошкент шаҳари:

ҳудудий молия ва солиқ органлари билан келишилган ҳолда бозорлар ва савдо комплексларининг маъмурияти томонидан ундириб олинадиган бир марталик йиғимлар, ижара тўлови ва кўрсатиладиган хизматлар қиймати миқдорларини Ўзбекистон Республикаси Молия вазирлиги ва Давлат солиқ қўмитаси томонидан ҳар йили белгиланадиган минимал миқдорлардан паст бўлмаган миқдорда ҳар йили тасдиқласинлар;

Ўзбекистон Республикаси Давлат солиқ қўмитаси билан биргаликда бозорлар ва савдо комплексларининг раҳбарлари 2010 йилнинг 1 майига қадар муддатда бир марталик йиғим, ижара тўлови миқдорлари тўғрисидаги маълумотларни, шунингдек кўрсатиладиган мажбурий хизматлар рўйхати ва қийматини тасдиқласинлар ҳамда бозорлар ва савдо комплексларига кириладиган барча жойларга осиб қўйсинлар.

5. Белгилансинки, 2010 йилнинг 1 июлидан бошлаб 2-иловага мувофиқ рўйхат бўйича товарнинг олиб кирилиши ва божхона тўловлари тўланиши

фактини тасдиқлайдиган божхона декларацияси расмийлаштирилган санадан кейин 12 ой ўтгач тайёр импорт истеъмол товарлари сотувга қўйилиши ҳамда чакана савдода реализация қилинишига йўл қўйилмайди.

Товарнинг олиб кирилиши ва божхона тўловлари тўланиши фактини тасдиқлайдиган божхона декларацияси расмийлаштирилган санадан кейин 12 ой ўтгач тайёр импорт истеъмол товарларининг реализация қилиниши савдо қоидаларини бузиш (товарларни ҳужжатларсиз реализация қилиш) деб ҳисоблансин ва қонун ҳужжатларига мувофиқ жавобгарлик чоралари қўлланилсин.

6. 2010 йилнинг 1 октябрдан бошлаб қуйидагиларни назарда тутувчи тартиб жорий қилинсин:

аҳоли билан пул ҳисоб-китобларини амалга оширувчи хўжалик субъектлари томонидан қўлланадиган назорат-касса машиналари ягона техник талабларга мос келиши ва «Ўзстандарт» агентлиги томонидан белгиланган тартибда мажбурий сертификациядан ўтказилиши лозим;

сертификати бўлмаган ёки белгиланган ягона техник талабларга жавоб бермайдиган назорат-касса машиналаридан фойдаланган ҳолда чек бериш айбдор шахсларни қонун ҳужжатларига мувофиқ жавобгарликка тортиш учун асос бўлади.

7. Белгилаб қўйилсинки, 2010 йилнинг 1 июлидан бошлаб чакана савдо корхоналари, микрофирмалар ва хизмат кўрсатиш соҳасининг кичик корхоналари қонун ҳужжатларига мувофиқ ягона солиқ тўловларини тўлайдилар, аммо худди шундай фаолият турини амалга ошираётган яқка тартибдаги тадбиркорлар томонидан тўланадиган қатъий белгиланган солиқ миқдоридан кам бўлмаган суммани тўлайдилар.

Ўзбекистон Республикаси Молия вазирлиги Давлат солиқ қўмитаси билан биргаликда бир ой муддатда қонун ҳужжатларига тегишли ўзгартиришлар тўғрисида Вазирлар Маҳкамасига таклифлар киритсин ва ягона солиқ тўловини тўловчилар уни тўлашнинг янги тартиби тўғрисида белгиланган тартибда хабардор қилинишини таъминласин.

8. Ўзбекистон Республикаси Давлат солиқ қўмитаси, Давлат божхона қўмитаси, Молия вазирлиги, Адлия вазирлиги бошқа манфаатдор вазирликлар ва идоралар билан биргаликда бир ой муддатда бозорлар ва савдо комплексларининг фаолиятини тартибга солувчи меъёрий-ҳуқуқий ҳужжатларга қўшимчалар киритиш, шунингдек қонун ҳужжатларига мазкур қарордан келиб чиқадиган ўзгартиш ва қўшимчалар тўғрисида Вазирлар Маҳкамасига таклифлар киритсин.

9. Ушбу қарорнинг ижросини назорат қилиш Ўзбекистон Республикасининг Бош вазири Ш.М. Мирзиёев зиммасига юклансин.

**Ўзбекистон Республикаси
Президенти**

И. КАРИМОВ

Тошкент ш.,
2010 йил 26 апрель,
ПҚ-1326-сон

Ўзбекистон Республикаси
Президентининг 2010 йил 26 апрелдаги
ПҚ-1326-сон қарорига
1-ИЛОВА

**Савдо комплекслари, деҳқон, ихтисослаштирилган ва буюм бозорларида фискал хотирали назорат-касса машиналарини мажбурий равишда қўлланган ҳолда аҳоли билан пул ҳисоб-китобларини амалга оширувчи қўшимча объектлар
РЎЙХАТИ**

1. Озиқ-овқат ва ноозиқ-овқат товарларини реализация қилиш бўйича умумфойдаланадиган ихтисослаштирилган турғун павильонлар.
2. Автотранспорт воситаларини вақтинча сақлаш, шу жумладан бозорга туташ ҳудудларда вақтинча сақлаш жойлари.
3. Аҳолидан тўловларни, шу жумладан уй-жой-коммунал хизматлар, телефон ва уяли алоқа хизматлари учун тўловларни қабул қилиш пунктлари.
4. Бозорларнинг маъмурияти томонидан бир марталик йиғим ва ижара тўловларини қабул қилиш пунктлари.

Ўзбекистон Республикаси
Президентининг 2010 йил 26 апрелдаги
ПҚ-1326-сон қарорига
2-ИЛОВА

**Товарнинг олиб кирилиши ва божхона тўловлари тўланиши фактини тасдиқлайдиган божхона декларацияси расмийлаштирилган санадан кейин 12 ой ўтгач савдога қўйилган ва чакана савдода реализация қилинишига йўл қўйилмайдиган тайёр импорт истеъмол товарлари
РЎЙХАТИ**

Товарларнинг номи

1. Тикувчилик буюмлари
2. Устки трикотаж
3. Ички трикотаж
4. Спорт трикотажи
5. Пайпоқлар
6. Кўрпа-гўшак ғилофлари (алоҳида-алоҳида ва комплект ҳолда)
7. Тюль-гардин полотноси ва буюмлари
8. Паҳмоқ сочиқлар, чойшаблар, халатлар
9. Чарм пойабзал
10. Телевизорлар
11. Музлатгичлар
12. Кондиционерлар
13. Электр дазмоллар